

校補安南棄守本末

安南棄守本末補

永樂二年八月壬申遣使齎諭安南國王胡查曰前以爾屢侵占城故諭爾講信修睦及得爾奏云自今已往敢不息兵朕嘉爾能改過復降勅慰勉近占城復奏爾今年又以水軍攻掠其境拘虜人民其朝貢人回所齎賜物皆被邀奪及逼與冠服印章使為臣屬越禮肆虐有加無已而廣西思明府亦奏爾奪其祿州西平州永平寨之地此乃中國所疆爾奪而吞之肆無忌憚所為如此蓋速亡者也朕未忍遽行討罪故復垂諭鬼神禍淫厥有顯道爾宜速改前過不然非安南之利也

丁丑賜占城國王占巴的賴鈔幣并賜敕諭曰王復奏安南侵擾等事已再勅責胡奎王亦宜修德務善以保國人如奎冥頑不悛曲在於彼朝廷自有處置

三年正月己亥賜朝鮮安南使臣來朝韃毳并雲南等處土官宴於會同館

四年四月甲申勅鎮守雲南西平侯沐晟曰比遣都督黃中等送安南王孫陳天平還國中等不遵朕言輕視黎賊率意而進以至辱國今興師南伐勅四川等都司選卒七萬并勅蜀王於成都三護衛選卒五千聽爾調遣大軍合用糧儲須預為會計從便規畫輸運不可後期賜晟白金

五百兩遣翰林侍讀曾日章齎勅諭西平侯沐晟日章陛
辭上曰朕所欲告晟者具載於勅爾以朕言諭之故黔寧
王感高皇帝厚恩盡心竭慮功在社稷名垂竹帛爾今日
受國家之寄非輕為子而能繼父之功業孝莫大焉為臣
而能廣君之謀猷忠莫大焉如苟足於目前必無遠大之
計周慮於事外必建奇偉之功恃一己之能易盡集衆人
之智無窮其必勉之勅蜀王椿於三護衛選馬步軍五千
雲南貴州四川都指揮使司選馬步軍七萬俱隸西平侯
沐晟就雲南操練聽征

五月庚寅朔勅浙江福建江西廣東廣西湖廣都指揮使

司調軍八萬往廣西聽征

壬寅命戶部內外將士從征安南者其俸糧皆給全米
甲辰勅廣西總兵官都督同知韓觀今大軍征討黎賊合
用糧餉已勅戶部先撥二十萬石爾即與廣西都司布政
司規畫調發軍民運赴順便去處貯之俟大軍至順帶前
去餘令土兵隨軍饋運

勅鎮江蘇州鎮海金山建陽新安九江儀真高郵淮安安
慶六安滁壽泗揚邳徐廬宣二十衛精選馬步軍一萬往
廣西聽征安南

命大理寺卿陳洽赴廣西計議軍事以都督黃中呂毅前

送陳天平失律徵赴京

丁未賜安南歸附人裴伯耆冠帶命隨大軍南征

六月乙丑勅廣西總兵官都督同知韓觀大理寺卿陳洽於廣西各土官衙門選土軍三萬以九月初十日會太平府聽征仍令觀等詢察安南賊中動靜以聞

戊辰勅湖廣浙江福建都指揮使司增撥軍士一萬五千福建浙江屬衛仍選精壯韃軍令韃官統領俱赴廣西聽征

甲戌勅山東都指揮使司前命將青州二護衛及儀衛司軍校分調各衛今可精選一千名遣官統領赴京隨總兵

官南征

丁亥刑科都給事中張信等劾奏都督僉事黃中呂毅率師失律宜正典刑上命姑貸其死俾立功以贖

七月戊子朔享太廟上還御奉天殿遣使祭告嶽鎮海瀆之神曰安南賊臣黎季犛及子蒼屢殺國主殲夷其宗篡奪其國改易姓名僭稱位號暴征橫斂淫刑酷法一方嗷嗷無所控訴又縱兵劫掠侵奪鄰封屢諭弗悛而騁詐逆命肆其凶毒今命將出師救民伐罪以是月十六日兵行特用致告惟神相之

壬辰浙江各衛指揮從征安南者陞辭上曰發兵為誅暴

誅暴為保民爾等必戒約軍士經過無秋毫犯民軍士餽
餉一出民力民勞甚矣不宜復侵擾之既入安南之境當
區別善惡毋致玉石俱焚今國家發兵以行弔伐將帥行
師必嚴紀律弔伐以施仁義紀律以戢貪暴如貪暴不戢
則仁義不行宜勉盡爾職以副委任若有不遵朕命妄戮
一人雖建奇功不得贖罪

癸巳勅征討安南左副將軍西平侯沐晟曰古人有言師
克在和故軍門謂之和門爾為副將總兵官有所調遣相
機審勢如無妨碍即須應調或總兵官遙度與爾處事有
所妨或正與賊相拒或道路梗塞勢難赴之即明白具報

不可故違以傷和氣將帥不和取敗之道爾宜慎之

癸卯征討安南總兵官成國公朱能等率師起行車駕臨祭大江諸神祭畢饗將士上臨江送之天日開朗順風揚帆旗幟精明鼓角謹亮上喜知安南之必平也

七月壬子勅征討安南總兵官成國公朱能等曰師克安南凡各國人先被黎賊虜掠者悉釋遣還

閏七月己未勅征討安南總兵官成國公朱能等曰師入安南下郡邑凡得文籍圖志皆勿毀

己巳征討安南左副將軍西平侯沐晟奏請於雲南各處運糧二十二萬石赴臨安及蒙自收貯以待用雲南井鹽

亦移於蒙自開中及於雲南都司增撥官軍一萬委都指揮萬中把都等領於蒙自以外連營駐劄備運糧儲以為聲援從之因勅晟曰為事隨征軍官原罪重者作為事官名目與半俸罪輕者復原職與全俸隨征無功仍坐原罪庚午勅廣東都指揮司選精銳軍士六百人以能幹千戶二員百戶六員領之具器甲糗糧由海道往占城會合軍馬防遏黎寇

八月庚子占城國王占巴的賴遣其孫部坡亮微郊蘭得勝那抹等來朝貢白象方物且言安南黎賊數侵掠其境土人民請兵討之賜其孫白金二百兩金織文綺紗羅衣

各二襲鈔百錠文綺紗羅十四疋其僂從鈔幣襲衣有差
命禮部宴勞之

壬子遣內官馬彬等齎勅諭占城國王占巴的賴曰爾遣
孫部坡亮微郊蘭得勝那抹等來朝貢方物且言安南黎
賊侵奪地界驅掠人畜肆虐不已請兵討之朕以黎賊屢
弑國主篡奪其位僭號改元毒痛下民舉國憤怨其前王
孫陳天平被其迫逐歸命朝廷黎賊請迎歸國以君事之
朕推誠不疑遣人資送乃中途邀而殺之抗拒朝命罪惡
滔天不可容道已命總兵官征夷將軍成國公朱能等率
大軍往討其罪務在殄滅以安黎庶爾宜嚴兵境上防遏

要衝其安南人先居占城者不問自今有逃至者皆勿容
隱但得黎賊父子及其黨惡即械送京師厚加賞賚爾宜
勉之仍賜之鍍金銀印及紗帽金帶黃金百兩白金五百
兩金織文綺衣二襲并錦綺紗羅等物

九月戊午廣東都司送至欽州所獲黎賊覘伺之人遂勅
總兵官成國公朱能等曰賊已遣人於廣東緣海偵伺慮
其知海道無兵併力於爾宜加意慎防不可忽略

壬申勅征討安南總兵官成國公朱能等曰軍中事宜前
勅已備爾宜詳慎審度而行臨敵之際但有持兵來拒者
殺不釋若迎降納款及奔走避匿者皆不殺庶副朕愛人

之意

十月戊子征討安南總兵官成國公朱能以疾卒于龍州
右副將軍新城侯張輔代總其衆以進且遣人馳奏

丙午征討安南總兵官征夷將軍成國公朱能卒訃聞上
哀悼輟視朝五日遣使諭祭命有司給其喪事護送還京

師

丁未命征討安南右副將軍新城侯張輔佩征夷將軍印
充總兵官仍以雲陽伯陳旭為右參將率師征安南勅諭
之曰皇考太祖高皇帝命大將軍開平王常遇春偏將軍
岐陽王李文忠等率師北征而開平王卒於柳河川偏將

軍岐陽王率諸將掃蕩殘胡終建大勳著名青史爾等宜
立志自強取法前人乘此冬月瘴癘肅清同心協謀殄除
逆賊建萬世勳名以副朕之委任

十一月庚申勅征討安南總兵官征夷將軍新城侯張輔
左副將軍西平侯沐晟曰從征將士養之平時而用之於
今日其有能挺身自奮斬關殺將衝堅破陣出奇立功者
皆籍識姓名師還之日重加陞賞以旌其勞

壬午勅征討安南總兵官征夷將軍新城侯張輔左副將
軍西平侯沐晟等曰聞官軍與賊相持賊計正欲延緩以
待瘴癘破之宜速不宜緩必以明年二月滅賊班師

十二月癸卯征討安南左參將豐城侯李彬右參將雲陽伯陳旭率師擊黎賊西都賊聞多邦城陷焚西都宮室倉庫逃入海賊黨有依天健山等處而以兵由生厥江潭舍江犯官軍者總兵官新城侯張輔遣都督黃中等屢敗之於是三江路宣江洮江等州縣次第詣軍門降

五年正月甲子勅征討安南總兵官新城侯張輔等曰聞爾已破賊東都得糧甚多足充軍食宜愛惜勿妄費廣西所運餉即停罷如已在途就所至城堡貯之令如法守備輓運軍民悉罷歸

二月丙戌朔征討安南總兵官新城侯張輔等遣南策州

人莫邃等宣上德意安輯諸郡縣官吏軍民令官還原職
兵還原伍民還原業訪求陳氏宗族選嫡而賢者一人送
京師請命復其王爵

癸巳勅征討安南總兵官新城侯張輔等曰師克安南之
日其境內才德賢智之士及有一善可稱一藝可用者廣
為詢問悉以禮遣送赴京

五月壬午征討安南總兵官新城侯張輔等平安南捷奏
至羣臣入賀曰黎賊父子違天逆命今悉就擒皆由聖德
合天人神助順上曰此誠天地宗社之靈將士用命所致
朕何有焉羣臣復以開設三司及郡縣為請上命降詔行

之

七月壬申交趾總兵官新城侯張輔等奏交趾都司城傾圮宜修築及清化宜立衛兼前留守丘溫隘留二關官軍守禦皆從之

九月丁巳頒賞交趾鎮守官軍及有司官吏等鈔一品二品十五錠三品四品十二錠五品十錠六品七品八錠八品至雜職并辦事官各六錠旗軍土軍各五錠吏典知印承差各二錠耆民各一錠

交趾左副將軍西平侯沐晟遣百戶張鎮等械送賊將胡聞等三人至京賞鎮等銀鈔綵幣綿布有差

癸酉交趾總兵官新城侯張輔遣送交趾諸色工匠七千
七百人至京上念南土遠來不耐寒命工部悉給綿衣
十月辛巳朔以交趾所舉明經士人甘潤祖等十一人為
諒江等府同知賜勅慰勉上復親製詩賜之

丁亥交趾總兵官新城侯張輔等奏訪舉交趾郡縣懷才
抱德明經能文博學有才聰明正直孝弟力田賢良方正
練達吏事明習兵法及材武諸色之人凡九千人陸續遣
送赴京上以冬月氣寒南荒之人不耐命工部遣官以綿
衣靴襪即途中賜之

戊戌命戶部員外郎黃通理等監闡交趾鹽課時交趾總

兵官言其地所產鹽每歲老嫗等處以金求易命仍其舊
故遣通理等三人監開人賜鈔七十錠

癸卯追封故安南國王陳氏子孫七人以叔顛為亞中大
夫交趾等處承宣布政使司左參政沆為亞中大夫交趾
布政司右參政淵濟為朝列大夫交趾布政司左參議曰
章元胤國柱為朝列大夫交趾布政司右參議初詔安南
陳氏子孫宗族為黎賊所害者宜加恤典贈之以官至是
有司具名來聞故有是命

十一月辛亥朔勅交趾總兵官新城侯張輔等曰將士久
勞在外今罪人既得撫安平定之後宜及時班師

15109
癸丑勅交趾總兵官新城侯張輔等曰今交趾已平如有
反側必當勦滅然宜戒飭將士不可濫及無辜雖凶逆之
家其幼稚男子皆不可殺但驅入內地或為奴或為民惟
執兵拒敵者必殺不釋勅左副將軍西平侯沐晟等亦如
之

戊寅交趾土人陳紆陳光祉陳洽等六十七人來朝貢金
銀器及方物賜之鈔幣襲衣

六年正月癸丑勅交趾總兵官新城侯張輔等曰前以將
士久勞于外令爾等撫安平定及時班師今春氣向暖未
聞班師之期朕夙夜在念事或有妨速具奏聞

乙丑交趾布政司言郡邑初定倉廩未充官軍俸糧宜撙節支給今議一品二品三品月給米一石四品五品八斗六品七品七斗八品至未入流六斗旗軍吏典承差五斗待糧儲充羨別議奏請從之

戊辰設交趾太原嘉興廣威天關望江臨安新寧七鎮金場局各置大使二員副使四員又選授知州知縣二十一員每鎮三員提督閩辦又以知府二員總督令禮部鑄印給之 設交趾雲屯市舶提舉司置提舉副提舉各一員 二月乙丑交趾按察司僉事劉有年言交趾舊設諸州多不親民而於附郭置縣理民事請如內地以州管民而革

去附郭縣從之

癸卯交趾土官交州府知府阮均建昌府知府同彥翊演
州府同知黎思凱來朝陞均北京刑部左侍郎彥翊思凱
為右侍郎

三月庚申掌交趾布政司事尚書黃福言交趾初平其地
徵斂不一請酌量輕重為定制上曰比除交趾郡縣官朕
數諭之為政務寬簡以綏新附之民無重徵斂重斂者驅
民之策也福所言良合朕意遂命戶部會官定議務從輕
省

辛未勅交趾總兵官新城侯張輔等曰得奏班師去冬朕

念將士久勞在外命爾等及時班師今天氣已熱瘴厲方
作而始就道踰其時矣且善加撫卹無間將校軍士但有
一人病瘴死者爾等不得為全功

五月癸亥下詔悉赦交趾餘孽未盡者使各復業仍勅交
趾文武官務隆寬卹勿有侵擾一切不急之務皆停罷

乙丑交趾諒江府土官知府莫邃等來朝貢方物賜賚有
差

丙子交州人陳叔駢等率妻子家屬九十人來朝貢珊瑚
等物賜之鈔幣襲衣

六月庚寅上召新城侯張輔諭之曰安南已平皆將士用

命所致已命禮部定功次陞賞然賞罰不可不公賞罰公而後可以用人大抵全有功全有罪者明白易見若功在前罪在後者賞其功罰其罪過在前功在後者宥其過賞其功如此庶當人心其悉次第將士功過以聞

七月癸丑制諭羣臣曰朝廷爵賞以報有功惟其至公可服天下頃者安南不道不得已命將率師往行天討將士用命數月之間殄戮兇渠弔恤黎庶人用蘇息地用清寧爵賞之頒所宜至當新城侯張輔南征之際實總師旅審機出謀克明克斷率先將士奮不顧身遂生繫兇渠摧逆撫順今進封為奉天靖難推誠宣力武臣特進榮祿大夫

右柱國英國公食祿三千石子孫世世承襲賜冠服賞白金四百兩鈔一千錠綵幣四十表裏西平侯沐晟實佐總戎據誠奮勞謀協算獎率將士飛渡危險用成克定之功進封為顯忠輔運推誠宣力武臣特進榮祿大夫右柱國黔國公食祿三千石子孫世世承襲賜冠服賞白金三百五十兩鈔九百錠綵幣三十八表裏豐城侯李彬雲陽伯陳旭毗輔之任贊畫有勞但當臨敵之時不免稽違之過功賞所及必貴適中各增祿米五百石賞白金二百兩鈔二百錠綵幣十五表裏所司如制奉行

勅從征安南將士爾等敬承朕命竭忠效力攻城陷陣禽

戮渠寇平定一方今論功陞賞若所司有略爾之功增爾
之過致賞賚不當者或自增其功自隱其過致賞賚過當
者皆許自陳即與改正以合公道清遠伯王友昔奉天靖
難之疇其功績宜得封侯但以驕縱特挫抑之今從征南
交克勉自效摧鋒破敵屢著茂勳進封奉天靖難推誠宣
力武臣特進榮祿大夫柱國清遠侯賜冠服白金一百五
十兩鈔四百錠綵幣十表裏子孫世襲侯爵都督僉事柳
升據忠效力數立奇功窮追海濱生繫賊首封奉天翊衛
宣力武臣特進榮祿大夫柱國安遠伯賜同王友白金減
十五之一子孫世襲伯爵都督僉事朱榮戰鬪守備雖效

勞勩然屢以怠忽廢事略過敘功陞左軍都督府右都督
賞白金一百兩鈔三百錠綵幣八表裏都督僉事高士文
敵愾奮軀没于矢石嘉乃忠誠特加褒賚追封奉天翊衛
宣力武臣特進榮祿大夫柱國建平伯賞同柳升子孫世
襲伯爵都督僉事呂毅黃中先失律敗事後雖有功僅可
贖罪不在賞典都督程達以罪從征計其功能裁可自贖
賞典本不及之但以歿於戰陣今令子孫襲職賜白金四
十兩鈔一百錠綵幣四表裏領軍都指揮及充神機游擊
等五將軍都指揮指揮朱廣等十四人有功無過各賞白
金一百兩鈔二百錠綵幣八表裏內都指揮同知朱廣江

浩林帖木兒陞都督僉事都指揮僉事吳旺陳濬陞都指
揮使指揮使張勝陞都指揮同知指揮同知劉賽因不花
陞都指揮僉事指揮僉事丁能楊鴻哈麻丁陞都指揮使
都指揮使充將軍徐泰朱英沒于行陣各與褒贈令子孫
襲職都指揮同知充將軍左迪指揮僉事充將軍王恕都
指揮僉事黃義皆病死令子孫襲職都指揮方政等十五
人無過功視朱廣等不及各賞白金八十兩鈔一百六十
錠綵幣七表裏都指揮同知程寬陞都督僉事都指揮僉
事方政羅文等九人陞都指揮使指揮同知劉塔出陞都
指揮僉事指揮僉事朱貴陞都指揮使都指揮同知充將

軍毛八丹以戰沒賞典同徐泰都指揮同知曹英都指揮
僉事程鵬皆病死賞同左迪曹雲等六人無過功視方政
等不及各賞白金六十兩鈔一百二十錠綵幣六表裏內
都指揮僉事吳凱葛森陞都指揮同知都指揮僉事俞勛
被鎗死指揮僉事充將軍曹雲戰死賞同毛八丹指揮僉
事孫竑溺死王聚病死賞同程鵬其都指揮姜清師祐無
過功視曹雲不及各賞白金四十兩鈔八十錠綵幣四表
裏都指揮巫凱孔斌俞讓柳琮指揮充將軍高鵬援銳江
橋慢功致賊焚倉糧孔斌病愈避事俞讓柳琮雖功等陳
濬然俞讓追賊日南迷道幾致誤事柳琮懦怯又在困枚

不受約束各賞白金四十兩鈔八十錠綵幣四表裏都指揮劉清雖有功三次然先守壩不謹後守銳江遇賊而却致賊焚糧儲都指揮程瑒先運糧後捕賊亦頗效力然不援徐泰致其戰沒皆過重各賞白金三十兩鈔六十錠綵幣三表裏都指揮充將軍魯麟雖有功三次然于奇羅海口擒賊惟務貪財幾至賊首逃竄又私毀偽印二顆功不掩罪賞同劉清都指揮張勝等八人惟守關堡俱無戰功各賞白金十五兩鈔六十錠綵幣三表裏其為事立功復職都指揮徐諫等七人有功無過亦第其高下而賞之其都指揮都指揮充將軍及都指揮內有戰沒者於本賞外

加白金三十兩鈔六十錠綵幣三表裏中傷死者減三之一仍依郵典給糧米麻布其多邦隘先登者原擬不次陞賞凡一十九人都指揮蔡福陞都督同知賞白金一百五十兩鈔四百錠綵幣二十表裏指揮同知毛忠陞都指揮同知賞白金一百兩鈔三百錠綵幣十二表裏指揮僉事田真陞都指揮僉事賞同毛忠正千戶周趙保李文陞指揮使副千戶趙亮邵成陞指揮同知各賞白金六十兩鈔二百錠綵幣八表裏總旗尹和等四人陞正千戶各賞白金四十兩鈔一百六十錠綵幣五表裏小旗江興兒等四人陞副千戶各賞白金三十兩鈔一百二十錠綵幣四表

裏軍士沈伴兒等四人陞百戶各賞白金二十兩鈔八十錠綵幣二表裏仍各賜織金紅絲衣一襲并冠帶各一其餘官軍有奇功者領隊指揮白金四十兩鈔八十錠綵幣四表裏千戶衛鎮撫白金二十五兩鈔六十錠綵幣三表裏百戶所鎮撫試百戶長官白金十五兩鈔五十錠綵幣二表裏巡檢頭目總旗總甲鈔四十錠絹三疋布二疋小旗小甲鈔三十錠布四疋隨伍官白金五兩鈔二十四錠布三疋巡檢頭目旗甲軍人力士校尉舍人土兵象奴軍伴餘丁戶丁韃官子弟及軍吏鈔四十錠布三疋頭功者領隊指揮白金一十五兩鈔六十錠綵幣三表裏千戶衛

鎮撫白金一十兩鈔五十錠綵幣二表裏百戶典仗所鎮
撫試百戶長官白金八兩鈔四十錠綵幣一表裏巡檢頭
目總旗總甲鈔三十錠絹二疋布一疋小旗小甲鈔二十
四錠布三疋隨伍官白金五兩鈔二十錠布二疋巡檢頭
目旗甲軍人力士校尉士兵象奴軍伴餘丁戶丁韃官子
弟及軍吏鈔二十錠布二疋次功者領隊指揮白金一十
兩鈔五十錠綵幣二表裏千戶衛鎮撫儀衛正副白金八
兩鈔四十錠綵幣一表裏百戶典仗所鎮撫試百戶長官
鈔三十錠絹二疋巡檢頭目總旗總甲鈔二十四錠布三
疋小旗小甲鈔二十錠布二疋隨伍官員頭目旗甲軍人

力士校尉舍人土兵象奴軍伴餘丁戶丁韃官子弟及軍
吏鈔十六錠布一疋其為事立功官有奇功者已復職官
領隊賞同頭功已復職官隨伍并未復職官及旗軍民人
等賞同頭功內巡檢人等頭功者已復職官領隊賞同次
功已復職官隨伍并未復職官及旗軍民人等項賞同次
功內隨伍官員人等次功者已復職官領隊指揮等賞同次
功內千戶衛鎮撫等已復職官隨伍并未復職官及旗軍
民人等項鈔十錠布一疋其陣亡者本賞外加指揮白金
二十兩鈔五十錠綵幣二表裏千戶衛鎮撫白金一十五
兩鈔四十錠綵幣一表裏百戶所鎮撫白金十兩鈔三十

錠綵幣一表裏總旗鈔二十錠絹三疋小旗鈔十六錠布
三疋軍人鈔十二錠布二疋中傷死者加指揮白金十五
兩鈔四十錠綵幣二表裏千戶衛鎮撫白金十兩鈔三十
錠綵幣一表裏百戶所鎮撫白金八兩鈔二十錠綵幣一
表裏總旗鈔十八錠絹二疋小旗鈔十四錠布二疋軍人
鈔十錠布一疋失陷并截殺者加賞與中傷死同官軍人
等征討黎賊并勦捕安南叛賊其功一併論賞奇功二次
以上者本賞外領隊官加白金五兩鈔二十錠綵幣一表
裏頭目旗甲鈔十二錠布三疋隨伍官旗甲軍人等鈔十
錠布二疋守關堡并運糧官軍人等賞視次功內有都指

揮賞視頭功指揮戰死及中傷失陷截殺死者給麻布米
糧當陞者奇功指揮千百戶儀衛正副衛所鎮撫典仗總
小旗俱陞二級總甲陞試百戶小甲陞總旗頭功指揮千
百戶儀衛正副衛所鎮撫典仗總小旗俱陞一級總甲實
授總旗小甲實授小旗為事立功官旗有奇功者已復職
役指揮千百戶儀衛正副衛所鎮撫并總小旗俱陞一級
未復職役而有奇功頭功各復職役
甲寅勅五軍各衛所曰征南官校已論功陞用然皆因軍
士敢勇乃能成功其有奇功頭功者即具名來聞奇功陞
總旗頭功陞小旗就調補所陞總小旗之缺若功在奇功

之上者量授官職以酬其勞

乙未罷山西都指揮同知魯麟為民麟從征交趾有功而罪重故既賞其功不貸其罪罷為民南丹

庚申命靈谷寺朝天宮建齋醮三日資薦征南亡沒將士
乙丑交趾都司秦衛所存留軍士不足守備今廣東都指揮使孫全統軍萬餘餽運至船艦兵器皆具請暫留備禦從之

八月乙酉勅掌交趾都司都督僉事呂毅黃中等曰簡定等叛已命黔國公沐晟率師往討爾可整兵聽調仍備水軍二萬及舟楫器械待用

癸卯賜淳泥國王麻那惹加那乃及于聞東洋等處使臣
交趾諒江府知府莫遷等宴

十月己卯陞交趾太原州為太原府宣化州為宣化府改
宣化州稅課局為稅課司設太原府稅課司革威蠻州之
山定縣福安州之保福縣三帶州之扶隆縣利仁州之清
廉縣慈廉州之丹山縣嘉林州之安定縣武寧州之仙遊
縣北江州之新福縣諒江州之清安縣南策州之青林縣
上洪州之唐濠縣洮江州之山圍縣宣江州之東欄縣沱
江州之隴拔縣長安州之威遠縣東潮州之東潮縣靖定
州之同安縣下洪州之長津縣以其地各入本州改扶隆

縣之江口鎮巡檢司隸山帶州清廉縣之涇螭巡檢司姜
橋馬驛隸利仁州丹山縣之喝江口巡檢司隸慈廉州保
福縣之保福驛隸福安州之山定縣稅課局及山定河泊
所隸威靈州清安縣之稅課局隸諒江州青林縣之稅課
局及平灘江口巡檢司隸南策州唐濠縣之金縷稅課局
隸上洪州山固縣之陳舍巡檢司隸洮江州東欄縣之古
雷江口巡檢司隸宣江州隴拔縣之費舍巡檢司隸沱江
州東潮州之天廖江屯山巡檢司隸東潮州同安縣之同
安海口巡檢司隸靖安州長津縣之稅課局及波了社巡
檢司隸下洪州設北海府常儲倉新安府常積倉諒江府

常益倉各置大使副使一員

甲申賜交趾右參政莫邃參議莫勛占城國榜葛刺國哈刺火州雲南車里老撾及瓦刺等處使臣宴

甲午交趾都指揮使張欽卒欽巢縣人襲父職為雲南右衛指揮使永樂四年從黔國公沐晟征安南嘗領哨騎千人覘賊於奇羅海口猝與賊遇欽奮身提槊而前與戰數合賊敗走部卒李保保追擒偽衛國王黎澄及其子二安南平陞欽交趾都司都指揮使云

庚子設交趾各州縣巡檢司三十七所清化府二十六巴龍關諾河洛關堯山關隸古雷縣巴禮涇口隸永寧縣箇

勾厯關巴凜關瓮冊關隸磊江縣險石關清都鎮隸安樂
縣蒲巴鄰關絹槐關隸細江縣屯卞關玉局關涓忙關俄
樂關隸俄樂縣靈長海口靈長渠口隸河中縣支俄渠口
隸支俄縣典史海門隸九真州濠渠口沈渠口隊隈隸結
悅縣布衛海口隸緣覺縣要翁關立關黑關隸農貢縣諒
江府一三江口隸清遠縣三江府一洞淋砦隸夏華縣北
江府二石神隸嘉林州小江橋隸東岸縣建平府二巴辣
口屯隸安本縣虎河隊江口隸安謨縣建昌府一三江口
隸芙蓉縣宣化府一關濠隸曠縣廣威州三多隘可凜隸
本州八圭隸美良縣 置交州後衛三江衛二經歷司經

歷各一員增置雲屯市舶提舉司提舉吏目各一員設新平順化二市舶提舉司提舉雲屯新平順化三抽分場宣化府銀場局司置提舉一員副提舉二員場局置大使各二員副使各四員

十二月乙亥交趾總兵官黔國公沐晟奏率兵往交趾勦遺孽所過郡縣土官應入朝者乞暫留在職理事從之初詔交趾土人以勞授官者事平之後以次來朝賞勞之至是以晟言姑止

丙戌交趾交州等府利仁等州土官知州阮壇等四十三人來朝賜鈔及紵絲綾絹衣有差

甲午勅交趾都司掌司事都督僉事呂毅等今調軍征勦
餘寇所在淘金之類宜悉停止其發去官旗軍匠取回操
備不許占留

七年正月甲子設交趾清化府之廣儲倉丘溫縣之丘溫
倉雞陵縣之鎮夷倉磊江縣之牛鼻關古弘縣之會潮海
口支俄縣之支隆海口神投海緣覺縣之天甲海口廷河
縣之徑農江口古蘭縣之綴口大全江口雞陵縣之鎮夷
關淵縣之坡壘關水浪縣之博花江口應平縣之寧橋雲
屯縣之雲屯快州之阿魯口十四巡檢司交趾鹽課提舉
司之安口安和支封同安四場鹽課司永寧縣之屢柳宋

江縣之可屢二馬驛丘温縣之丘縣董縣之董站雞陵縣之施澍三驛水浪縣之稅課局設官如例

辛未勅廣西廣東湖廣四川浙江福建江西貴州雲南各都指揮使司鎮江等十三衛共發兵四萬楚遼寧三府護衛共發七千從英國公征勦交趾叛寇

交趾布政司左布政使張顯宗卒顯宗字明遠汀州寧化人洪武中進士及第授翰林院編修陞太常寺丞再陞國子祭酒建文中陞工部侍郎坐事免交趾平復起為左布政使顯宗家居有孝行從政通敏為祭酒首疏便宜數事申明學規修舉百廢綱紀一新其為交趾當平定之初夷

民未安顯宗宣上恩德勞來撫綏民皆安之同時有王斌者平涼靜州人為清林縣典史招集新附勤于撫字後陞縣為州斌當去民懷其惠奏請留之遂陞清林知州又有魏思善者任武寧州知州綏集境內盜賊屏息與顯宗俱終于官

壬申行在都察院左副都御史李慶劾奏交趾總兵官黔國公沐晟率師勦交趾叛寇不能奮勇制勝致喪師失陷都督呂毅尚書劉儁都指揮柳琮等法當治罪上曰為將喪師安得無罪姑曲宥之令勉圖後效

三月丙午廣東都指揮花英程場以罪免初英等從征交

陟畏避不進賄清遠伯王友迂道由欽州徑還至是事覺
當誅上念其舊勞特宥死仍發交陞從征立功贖罪

五月乙未上謂戶部尚書夏原吉等曰交陞弗靖久勞士
卒屢涉寒暑雖糧餉不乏而衣履敝壞夫欲人效力而資
用不繼何以責成功其令廣東廣西湖廣江西四川製衣
鞋五萬往給之原吉進曰昔楚伐蕭師人多寒王巡而撫
之三軍之士如挾纊彼感人言尚如此陛下施實惠誰不
思奮交陞餘賊臣知其易平也

八月甲子交陞總兵官英國公張輔等師至盧渡江太平
橋賊黨鄧景異棄營先遁遂招諭避賊之民復業而交州

北江諒江新安建昌鎮蠻等府鎮夷昌江市橋諸衛所皆
安集云

九月乙酉設交趾諒山北江建平三府及歸化南策二州
并雞陵董淵黎平武寧保祿平陸七縣醫學鹽課提舉司
之支俄長羅丹夾三場鹽課司歸化州稅課局右廩關巡
檢司

以交趾太原鎮金場局隸太原府嘉興鎮金場局隸嘉興
州廣威鎮金場局隸廣威州初設太原等七鎮金場局未
定管屬至是布政司言天關等四鎮蠻人寇亂道梗不通
太原等三鎮金場局已行開設宜各有所隸故有是命

十二月乙丑召交趾總兵官英國公張輔副總兵清遠侯
王友領都督朱榮蔡福林帖木兒及後調官軍還北京
八年正月丁酉命府軍左衛指揮僉事王剛子斌代職交
趾總兵官英國公張輔差朱福指揮使等檻送所獲偽大
越上皇簡定偽入內輔國太保大安海鎮將軍福成郡公
陳希葛偽東都路安撫使阮汝勵偽鈞鈴將軍管領鱗羽
軍阮宴及前所獲偽龍虎將軍管領神健軍武世僚并偽
尚書省樞密縣印皆至京伏誅

二月戊戌朔勅黔國公沐晟仍佩征夷將軍印充總兵官
雲陽伯陳旭充副總兵率師征勦交趾餘寇

辛丑復都指揮使盧旺官先是旺任雲南都司坐事謫交趾立功至是復其職於交趾都司

甲子英國公張輔等至自交趾入見命輔提督操練宣府萬全興和等處軍馬整治城池屯堡烟墩仍聽趙王調遣三月丁亥雲陽伯陳旭卒旭滁之全椒人洪武中以武功積官至會州衛指揮同知上初舉義旭舉全城來歸從上征討戰壩上白溝取濟南東平皆與有功累陞後軍都督僉事封雲陽伯永樂四年安南黎賊干紀命將往討之旭為右參將寇平還京賜賚甚厚既而陳季擴反旭從英國公張輔勦之及輔召還又命旭副黔國公沐晟命下而以

疾卒于軍事聞皇太子命賻祭如例

五月丁丑交趾總兵官黔國公沐晟統軍追勦賊首陳季擴至虞江賊棄柵遁追至古弘縣及會潮靈長海口斬首三千餘級生擒偽奉神衛神龍將軍黎弄

七月乙亥交趾按察司僉事劉有年言交趾各衛宜倣雲南例三分守城七分屯各立堡有警則入堡以待調發既不妨農亦不失用而邊有蓄積民免轉輸皇太子命兵部議行之

戊寅置交州鎮夷二衛城柵

己卯設交趾奉化清化二府稅課司諒江三江清化三府

并快州之醫學北江府之市橋倉諒江府之芹站倉奉化
府之廣積倉三江府之豐盈庫三帶州之長江歸化州之
石廩安立縣之茂阿朱貴文盤縣之忙梳文振縣之文盤
甘棠水尾縣之水尾巴羅九馬驛三江府之三江洮江州
之陳舍夏華縣之夏華三水驛清化府之古刀鎮安漠縣
之漠海口小民海口大汪海口安寧縣之苞蓬江口峽山
縣之椰園屯太平縣之太平海門水棠縣之都埋社萬寧
縣之阿葛屯同利縣之爭江屯廣源州之寨麻十一巡檢
司之愛州橋市古弘縣之大拜市及七源歸化二州文盤
振麻籠三縣七稅課局併愛州之支俄縣九真州之古平

縣清化州之細江縣各入本州其支俄縣之支隆海口神授海口支俄渠口細江縣之蒲巴陵關絹槐關五巡檢司各隸本州

九月己卯以禽獲交趾賊首簡定功陞交州衛軍士漆永定為千戶賜冠帶賞銀五十兩鈔三百錠綵幣三表裏餘陞賞有差

十月庚子交趾布政司言先頒降刑名事例交趾土人有雜犯死罪徒流遷徙者發丘温抵交趾充驛夫遞運夫雜犯死罪者服役終身徒流遷徙者各以所犯重輕為限官吏犯笞杖罪吏斷決還役官降用應解見任別敘及雜職

於邊遠敘用者皆斷決還職今新例徒流遷徙杖罪者皆
北京為民種田先後例不一皇太子曰交趾在萬里外宜
從先例令刑部移文知之

十二月己亥設交趾三帶州之長江安樂縣之安樂沱江
口之江州麻籠縣之真那社四巡檢司北江府之常盈庫
九年正月己卯命英國公張輔佩征虜副將軍印充總兵
官往交趾會合征夷將軍黔國公沐晟勦捕叛寇勅四川
廣西江西湖廣雲南貴州六都司安慶等十四衛發兵二
萬四千隨征勅交趾都司布政司按察使凡有犯重罪而
情可矜者發英國公張輔處立功贖罪

壬午吏部言明年天下官員皆應朝覲交趾新附宜命布政司按察司掌印官一員來朝餘令在任治事以安遠人從之

甲申上念將士復征交趾命戶部全支其俸糧以米

三月乙亥陞交趾宣化府土官同知黃公剔為太原府知府公剔上言交趾去京師遠土人之仕者恒念不獲躬覲朝廷文物之盛今來朝聖恩特加遷擢不勝慶幸誠願效勞輦轂之下以圖補報從之命吏部移交趾布政司給路費廩給遣其家屬來完聚

甲申上以交趾土官右參議莫邃等皆能竭力建功勦戮

叛賊固守境土遣人齎勅往勞賜之綵幣莫邃六表裏右
參議莫勛五表裏三江府知府杜維忠交趾府知府杜希
望鎮蠻府知府阮希俊新安府知府莫遠清化府知府梁
汝笏土官指揮陳封陳汝石丁宅武正四表裏宣化府同
知梁仕永太原府同知麻伯虎楊巨覽三表裏人各織金
綺衣一襲鈔千貫

四月丁巳交趾總兵官英國公張輔至南寧奏交趾反賊
陳季擴外示順服中實詭詐阮帥等逆狀顯著終無悛心
請進兵討之

五月丁卯設交趾鹽課提舉司之通濟鹽倉諒江府古隴

縣之小關巡檢司

己巳定交陟土官考覈例凡土官或遷調任用或本土世襲俱以三年為一考開任內事蹟行本衙門驗實申布政司按察司考覈平常者復職稱職者於官錢內量加賞賜復職闕茸不稱職者降一級於缺官衙門補用六年再考如前九年給由赴京通考黜陟若汙貪害民劫奪讐殺事有顯迹者聽按察司舉問如律

六月交陟布政司右參議解縉有罪徵下獄縉先為翰林學士兼右春坊大學士甚見寵任坐廷試讀卷不公出為廣西布政司右參議會有言縉嘗洩建儲時密議者遂改

交趾布政司命專督化州餽餉時翰林檢討王偁有罪謫
隨交趾總兵官在交趾教緝指言廣東化州二人遂共趨
廣東娛嬉山水忘返緝又上言請用數萬人鑿贛江以便
往來上曰為臣受事則引而避去乃欲勞民如此併偁皆
下獄後數歲皆瘐死

八月乙卯併交趾靖安之大瀆縣入新安縣
十一月己巳設交趾寧化州領赤土車來二縣直隸布政
司設武樂縣之平隆巡檢司新安府之廣設庫
庚午勅交趾總兵官英國公張輔黔國公沐晟曰指揮徐
彬來知賊勢已敗謂當即日禽戮首惡殄除餘孽以休息

將士而久不見報何也若寇已平定撫綏安輯尤宜用心
其民間有才能者即遣赴京授之以官俾回本境撫治其
人

永樂十年三月庚戌交趾太原府同知貢琛言交趾官吏
多有挈家來者或死于中途或歿于任所遺妻妾路遠不
能歸窘於衣食往往服未終而再嫁有傷風化今後應有
亡故官吏妻妾官為續食遞送還鄉守制庶全人倫厚風
化從之
七月癸巳設交趾政平州之游淪海門瓊林縣之芹海門
二巡檢司

八月辛未設交趾三江奉祀諒江北江建平建昌鎮蠻七
府僧綱司南策武寧嘉林福安三帶利仁慈廉威蠻八州
僧正司北江交州三江諒江奉化建平六府道紀司威蠻
道正司

丁丑賜交趾僧通法傷等三十三人鈔

十月癸亥命鎮守交趾都督韓觀督運廣東糧萬石赴交
趾給軍食

十一年二月癸亥勅交趾總兵官英國公張輔黔國公沐
晟今師老而賊未獲宜勉力成功以休息兵民
五月乙酉交趾三江府土官知府杜維忠遣姪必列交州

府知府杜希望遣子璩奉表貢馬及方物謝賜勞恩

乙巳交趾工匠百三十餘人以妻子至京命所司給鈔米衣服居室病者與醫藥

六月乙亥置交趾廣威州澄冊敬冊二巡檢司

七月己卯賜交趾土官判官陳麻歷等及哈烈使臣馬哈麻等宴

丁亥交趾總兵官英國公張輔具來降人姓名請授以職勅輔審度事宜隨其功之大小先授之然後具實來聞事平不用此例勅黔國公沐晟亦如之
壬辰遣使齎勅諭交趾布政司及府州縣官曰交趾新附

之民舊業多廢爾等宜輕徭薄賦勸課農桑務崇寬厚無
為刻薄勤加優卹使遂其生息以漸興于禮義之化庶幾
爾等可為盡職其勉之哉

十二月己酉交趾布政司右布政使王平卒平光州息縣
人洪武中國子生擢江西道監察御史陞陝西按察使上
即位召為都察院僉都御史坐事降衛經歷用薦陞福建
布政司左參政命從英國公征交趾事平陞交趾右布政
使時清化府蠻賊梗化平與都督黃中往鎮其地民賴以
安還至交趾卒平為人氣剛不容物臨政刻薄而所至不
受私餽及在交趾頗以酒色自縱云

十二年五月甲申交趾總兵官英國公張輔檻送所獲賊首偽大越國皇陳季擴偽驃騎大將軍特進開府儀同三司入內檢校統政太師平章事上柱國開國忠武公阮帥及偽印九顆并各賊家屬赴京師

六月庚戌置交趾安平新安順化三衛演州守禦千戶所又安衛南靖守禦千戶所時總兵官英國公張輔以四府與老撾占城暹蠻接境土地廣遠夷民繁夥宜有控制同黔國公沐晟議請于各府置衛所籍土軍以土官指揮千戶理其事仍請給印信皇太子從之

八月壬寅交趾總兵官英國公張輔執送賊首陳季擴阮

帥至京師伏誅

九月丙子置交趾又安新平順化三衛經歷司經歷濱州南靖二守禦千戶所吏目

閏九月戊申交趾總兵官英國公張輔黔國公沐晟等以交趾叛寇平委都指揮朱輝廖春率官軍五千留交趾備禦輔等各率官軍還

十二月庚寅設交趾寧化州瑰縣巡檢司

十三年二月癸未交趾總兵官英國公張輔黔國公沐晟等師還至京師

戊子行平交趾叛賊功賞先是上命行在禮部尚書呂震

兵部尚書方賓曰交趾遺孽哨聚山林劫害良善將士皆能竭忠效力殄除兇醜今還宜早定功賞震等議擬以奏上可之於是總兵官英國公張輔黔國公沐晟各賞白金五百兩鈔二萬錠彩幣五十表裏都督同知朱廣都督僉事江浩功次相等俱陞一級都指揮使方政比朱廣等功最多特陞二級各賞白金五十兩鈔三百錠彩幣五表裏都指揮僉事師祐領軍僉獲賊首陳季擴陞二級賞白金四十兩鈔二百錠彩幣四表裏都指揮僉事謝鳳等六員比方政功差不及陞一級其歿者子孫依例襲陞俱各賞白金三十兩鈔百六十錠綵幣三表裏都指揮陳濬等五

員比謝鳳等功又不及各賞白金二十五兩鈔百四十錠
綵幣二表裏胡通海等功次謝鳳各賞白金二十兩鈔百
二十錠綵幣一表裏皆不陞指揮僉事陶弘等禽獲正賊
鄧景異等為功頗難皆遞陞二級各賞白金三十兩鈔二
百錠綵幣三表裏織 絲衣一襲為從者陞一級白金
綵幣減三之二衣鈔如之百戶路坦等八人禽首賊陳季
擴功差易亦各陞二級所賞白金綵幣視弘減三之一衣
鈔如之其有積功多者皆不次陞遷指揮僉事吳興等五
人陞三級指揮使指揮同知僉事千百戶郭顯張銘等三
十人陞二級各隨所立功賞之調之官軍奇功三次或三

次以上者陞一級其於神投海口月常江慈廉縣安謨靈
長二海洋愛子江吒蒲幹冊有奇功二次者亦陞一級雖
有二次奇功而非前之處所立者止給賞仍於應得賞外
外半給之其有奇功者領隊指揮賞鈔二百錠綵幣三表
裏千戶衛鎮撫鈔百四十錠綵幣二表裏百戶所鎮撫鈔
一百錠綵幣一表裏隨伍官視領隊減半巡檢頭目總旗
總甲卒錠絹布一疋小旗小甲軍人力士校尉舍人餘丁
軍伴人等鈔二十四錠棉布二疋有頭功者領隊指揮鈔
一百錠彩幣二表裏千戶衛鎮撫鈔八十錠彩幣一表裏
百戶所鎮撫鈔六十錠絹二疋隨伍官視領隊減半巡檢

頭目總旗總甲鈔二十四錠布二疋小旗小甲軍人力士
校尉舍人餘丁軍伴人等鈔二十錠布一疋有次功者領
隊指揮視頭功領隊千戶千戶衛鎮撫視頭功領隊百戶
百戶所鎮撫視奇功隨伍巡檢頭目隨伍官視領隊減半
巡檢頭目總旗總甲鈔十四錠布一疋小旗小甲軍人力
士校尉餘丁軍伴人等鈔十錠布一疋為事立功而有奇
功者其已復職及初不動職者領隊指揮千百戶衛所鎮
撫皆與原提調官頭功領隊者同為事立功隨伍者減半
隨伍而未復職者如之旗軍人等鈔十六錠布一疋為事
立功而有頭功者其已復職及初不動職者領隊指揮視

原調官頭功領隊千戶千戶衛鎮撫視原調頭功領隊百
戶百戶所鎮撫視原調頭功隨伍巡檢為事立功隨伍者
減半隨伍而未復職者 如之旗軍人等鈔十錠布一疋
為事立功而有次功者領隊指揮視原調官次功領隊千
戶千戶衛鎮撫視原調次功隨伍巡檢為事立功隨伍不
問已未復職皆減半旗軍人等鈔六錠布一疋陣亡傷故
者于所得賞外加半給之仍給米布如著令於是陞左軍
都督同知朱廣為左都督中軍都督僉事江浩為都督同
知山東都指揮使方政為左軍都督同知福建都指揮僉
事師祐為都指揮使湖廣都指揮僉事謝鳳山西都指揮

僉事余廣廣西都指揮僉事朱輝俱為都指揮同知交州
後衛指揮使郭顯交州左衛指揮同知陳忠俱為交趾都
指揮同知指揮同知陳汝石交州右衛指揮同知陳封指
揮僉事劉震交州中衛指揮僉事韋源俱為交趾都指揮
僉事金吾前衛指揮使朱福府軍後衛指揮使黃成指揮
同知鄒陸富峪衛指揮使彭福安慶衛指揮使陳昭留守
右衛指揮同知朱傑羽林前衛指揮同知張銘指揮僉事
袁亮武成左衛指揮僉事薛聚金吾左衛指揮僉事吳興
旗手衛指揮僉事張貴會州衛指揮僉事耿 俱為都指
揮僉事羽林前衛指揮同知董忠王昇張貴指揮僉事張

文燕山左衛指揮同知周能府軍後衛指揮僉事陸讓通
州衛指揮同知吳興指揮僉事賈巖李興劉通俱為指揮
使指揮僉事李貴段得金吾左衛指揮僉事胡得羽林前
衛指揮僉事徐忠斌俱為指揮同知正千戶戴勉等金
吾左衛正千戶姜旺通州衛正千戶徐忠張興張覲楊銘
陳恭田聚王友王能席敬張清胡原李斌張貴安興周敬
周全周驢兒徐得陳興吳勝白敬劉招周通陳旺賴真林
通王紹羽林左衛副千戶戴貴孝陵衛副千戶顧興俱為
指揮僉事其餘黃州等衛指揮同知王暹等及千百戶鎮
撫以下四百餘人俱論功陞秩有差

三月甲子命交趾三江府知府熊宗魯為交趾布政司右
參議宗魯先為江西布政司參議坐事落職隨征交趾能
招撫夷民遂授三江府知府又坐事罷于工部兼督輸作
至是事完宥而用之

四月壬申設交趾濱州府之葵州又安府之茶籠玉麻二
州定升華府之升華思義四州所隸縣升州領黎江都和
安備三縣華州領萬安具熙禮悌三縣思州領持平白烏
二縣義州領義純鵝杯溪棉三縣

丁丑命交趾土人阮公侗為指揮僉事公侗鎮夷衛土官
阮如偶之子初如偶以禽賊首黎蒼功陞指揮僉事命還

交州督運糧餉溺水死公倜來朝故有是命

壬辰勅交趾總兵官英國公張輔交趾人才有可用者敦遣赴京用之

五月甲辰設交趾三江府稅課司沱江東潮二州并清波麻溪夏華三縣五稅課局太原府廣積庫利仁縣之涇濠江上思郎州之通廣新化縣之司岡江口楊舍社三巡檢司革諒山府水浪縣稅課局

八月丙戌徙交趾新安府治于鎮夷衛城內改南策州并至靈縣隸之以多翼太平二縣隸鎮蠻府初南策至靈隸諒江多翼太平隸新安至是交趾布政司言南策至靈近

新安多翼太平近鎮蠻改隸為便鎮夷衛正在南策至靈之地近移新安府治於鎮夷城內為便上悉從之

丁亥併交趾清化府之古弘縣入古藤縣愛州之河中統寧二縣九真州之緣覺結悅二縣各入本州諒山府之新安縣入丹巴縣如教縣入丘溫縣董縣入鎮夷縣七源州之水浪縣入本州琴縣入淵縣上文州之杯蘭縣入本州新木府之知見縣分隸衙儀福康二縣政平州之古鄧從質政和三縣南陵州之丹喬縣各入本州夜度縣入左平縣利仁州之古禮縣入本州古榜縣入平陸縣古者縣入利仁縣三帶州之元郎縣入扶寧縣威靈州之太堂縣入

本州鎮南府之新化縣入廷和縣神溪縣入古蘭縣靖安
州之安立縣入安和縣西關入太平縣河瑰縣入多翼縣
武寧州之安豐武寧縣二處北江州之安越縣南靖州之
和黃縣驪州之沙南縣各入本州路平縣入衙儀縣建平
府之平立縣入安本縣長安州之安謨縣入安寧縣建昌
府之俸田縣入建昌縣快州之施化縣宣江州之虎岩縣
各入本州諒江府之古勇縣入清遠縣革演州府以千冬
縣入演州併演州之芙蓉縣入瓊林縣革威蠻利仁福安
南策諒江嘉林沱江七源八州應威清平太堂古勇平河
太平河瑰多翼西關同利武寧善才細江麻溪清波夏華

文盤文振麻籠十九縣及上洪州之金縷愛州之椿市多
錦縣之麻浪唐安縣之司王侬祿縣之下昌古度縣之大
拜市稅課局其宣化府之長江威蠻州之山定利仁州之
養頊慈廉州之上古慈廉縣之兵神清威縣之清威太堂
縣之江潭清遠縣之翁羅古勇縣之粉池唐安縣之涇台
平河縣凍美河四岐縣之安定社四岐社域箇婁社安老
縣之古齋場支封縣之阿跂社膠水縣之圓光安謨縣之
安謨海口河泊所之同安支俄長羅三場鹽課司太平縣
之淹江口結悅縣之沉渠口三巡檢司三帶州倉并革之
十四年二月辛巳設交趾順為縣之僕江口水尾縣之清

水江寧化州之雞江口三巡檢司

四月癸未交趾鎮夷衛百戶丁仕驗來朝仕驗南策州民
初平交趾時能效力捕寇英國公張輔表授其職至是來
朝且貢馬謝恩賜鈔幣遣還

五月丙午設交趾府州縣儒學及陰陽學醫學僧綱道紀
等司交州北江建平諒江奉化建昌鎮蠻新安清化三江
太原宣化十二府歸化寧化三帶慈廉渠安武寧北江長
安諒江上洪快清化愛東潮下洪南策洮江沱江宣江一
十九州慈廉石室平陸安樂立石扶寧清潭芙蓉嘉林超
類慈山東岸善誓細江善才大灣望瀛清遠鳳山平河保

祿安寧古隴唐安西真膠水真利布建昌芙蓉東結永澗
太平水棠古費安老同利清沔至靈安定梁江麻溪清波
夏華西欄安定司農永通洞喜武禮當道文安曠楊底江
乙平原收物蒙麻籠安立六十一縣儒學諒江建昌鎮蠻
新安三江太原六府歸化福安慈廉北江武寧嘉林諒江
上洪快東潮下洪南策沱江萬崖十四州石室應平善才
安寧平河保祿安寧唐安多錦真利布芙蓉東結峽山水
棠古費安老至靈麻溪清波夏華古農當道楊底江平原
二十六縣陰陽學建昌鎮蠻新安太原宣化五府嘉興三
帶威蠻北江嘉林諒江上洪東潮下洪沱江沱江宣江十

二州麻籠安立水尾蒙清威應平細江善才望瀛大灣清
遠平河唐安多錦安寧古隴順為太平真利布芙蓉東結
永澗安老水棠清沔麻溪清波夏華古農收物三十一縣
醫學新安清化太原三府僧綱司嘉興廣威歸化北江長
安諒江上洪快東潮下洪靖安九真洮江沱江宣江七源
十六州僧正司慈廉扶寧安樂立石石室清威清潭芙蓉
嘉林超類慈山東岸善誓細江善才大灣安本平河保祿
安寧唐安多錦順為西真美祿真利布建昌芙蓉東結多
翼古蘭廷河太平峽山水棠古費四岐同利清沔至靈安
定東山梁江麻溪清波夏華古農富良安定當道曠楊收

物美良五十六縣僧會司建昌鎮蠻新安清化太原宣化
六府道紀司歸化福安利仁慈廉武寧北江嘉林長安上
洪快東潮下洪南策洮江沱江十五州道正司慈廉立石
清潭清威嘉林超類慈山東岸善誓善才望瀛安本黎平
平河保祿唐安美祿西真芙蓉東結太平水棠古費安老
四岐清沔至靈麻溪清波下華安定當道文安曠乙大蠻
收物三十七縣道會司

庚戌設交趾新安守禦千戶所

六月庚午交趾布政司右參議莫勛率其屬三江奉化等
府土官百三十九人來朝貢馬及金銀器等物上嘉勛等

先有歸款之誠繼有從征之勞特賜宴勞陞勛為本司右
布政使三江府土官知府杜維忠為右參政復賜璽書寵
異之餘官屬各陞一級賜彩幣有差
七月己未給戍交趾軍士衣鞋三萬七千六十五事仍令
廣東廣西湖南江西增製五萬事給之

八月乙酉交趾鎮夷衛指揮使陶弘交州左衛指揮同知
黃振三江衛指揮同知裴如隆俱遣人奉表貢馬及方物
謝授官恩各賜鈔幣遣還
十月丁亥禁交趾安息諸香不得出境
十一月庚子交趾土官都指揮僉事陳汝石遣其子文僚

等進馬謝恩賜鈔幣遣還

丙午勅交趾總兵官英國公張輔馳傳還京

十二月丙子陞三帶州知州張彛為江西布政司右參議
洮江州知州何廣為湖廣布政司右參議交趾布政司左
布政劉本為山東按察司交趾按察司副使阮友彰為福
建按察使

十五年二月丁卯命豐城侯李彬佩征夷將軍印充總兵
官往鎮交趾且諭彬曰交趾本中國地其人皆朝廷赤子
朕懷撫綏勤于夙夜爾久事藩邸忠厚謹飭簡在朕心用
是付茲重寄尤宜日親賢人君子效古良將之所為審度

事機區畫有法庶副朕之委任

勅兵部尚書陳洽曰今命豐城侯李彬往鎮交趾莫安邊
圍綏撫兵民爾諳彼人情可暫往贊襄俟有召回京

三月丁亥交趾北江等府州縣選貢生員鄧得等至京命
送國子監進學賜賚如雲南生例初上既平交趾即命郡
縣建學教養生徒至是始選貢焉

庚戌勅交趾總兵官豐城侯李彬曰朕命爾鎮撫一方有
罪者誅有功者賞必務公當乃可服衆
五月丁未擢交趾交州府土人頭目胡杜為乂安府知府
賜冠帶襲衣銀幣

丙寅設交趾東潮等州縣巡檢司東潮州之古輦江下墓
翁支封縣之阿躡社四岐縣之但江善才縣之箇齋江口
平河縣之麻牢江峽山縣之涇河高靖安縣之戶陳安和
縣之大隴東潮縣之新安社淡水江水棠縣之竹洞社同
利縣之婆移江布縣之語江口演州之羊變社偈江縣之
可楞江古社縣之三汊江思容縣之婆門社新安縣之脫
門海口其演州之偈江古社思容新安四縣民少如所設
弓兵不能及數命于衛所土軍內撥補
交趾總兵官豐城侯李彬奏交趾賊人阮貞等復聚衆于
陸那縣殺掠人畜今已就禽準律貞當死其妻子給功臣

之家為奴請于本境徇眾俾人知做懼從之

九月丙寅設交趾乂安府廣積庫衙儀縣丹台海門巡檢
司鹽課提舉司之博濟廣濟遠濟安濟演濟五鹽倉南界
真福千冬三場鹽課司

十月癸未朔交趾總兵官豐城侯李彬遣都指揮朱廣領
兵勦捕賊首楊進江廣攻破北晝等寨禽進江等悉斬以
徇餘賊潰敗

戊子革交趾新安府至靈縣之稅課局陰陽學僧會道會
司及太原府富良縣之僧會司以附郡城不應設也
十一月乙卯交趾升華府知府嚴律己等奏占城侵據地

方拘制所屬官不容理事勅總兵官豐城侯李彬斟酌處置

十六年正月庚午設交趾布政司承差五十人都司三十人按察司二十人都司布政司知印各一人

戊寅交趾布政司言初交趾新附軍儲不敷奏准開中四川雲南河東福建鹽糧時米價甚貴度地遠近定擬則例每引有米一斗五升者至三斗四斗者今連歲豐稔米價甚賤若依原定則例實為虧官今計議又安新平二府倉中納河東陝西運司鹽每引米二斗五升福建米三斗雲南黑鹽安寧二井米四斗白鹽井五井米三斗五升四川

本司各井米二斗五升仙泉十八井米三斗五升建平清
化二府倉中納河東陝西運司鹽每引米三斗福建米三
斗五升雲南黑鹽安寧二井米四斗五升白鹽井五井米
四斗四川本司各井米三斗仙泉十八井米四斗交州新
安諒江三府倉中納河東陝西運司鹽每引米三斗五升
福建米四斗雲南黑鹽安寧二井米五斗白鹽井五井米
四斗五升四川本司各井米三斗五升仙泉十八井米四
斗五升上從其議命所司行之

二月己亥交趾都指揮陳濬等遣人貢馬及黃金犀角象
牙諸物

辛丑先是交趾嘉興州四忙縣故土官知縣車棉子車三等叛殺流官知縣歐陽智等總兵官豐城侯李彬遣都督同知方政率兵討之賊以衆拒敵土官都指揮陳汝石千戶朱多蒲死焉官軍力戰大敗賊禽其弟車道等殺之車三以衆遁而山林深阻瘴癘方作官軍搜索不獲遂引還而遣人招諭之彬以聞且請褒恤汝石等以勵士心從之汝石南策人初為陳氏小校王師南征率先歸附討賊招降累著勞效積官至都指揮僉事追討叛賊車三深入賊陣中箭墜馬為所殺多蒲北江府東岸縣人亦以軍功得官與汝石奮勇殺賊被傷而死上命禮部並遣行人賜祭

購以米布有司造墳

三月丁巳設交趾順化府永盈倉安樂古藤農貢麻籠美良五縣儒學細江縣陰陽學廷河大灣二縣道會司

甲戌陞員外郎楊寧為交趾布政司右參議交趾布政司左參議馮貴為本司左參政

四月甲辰交趾總兵官豐城侯李彬以交州中衛指揮同知黃振等討殺叛寇黎核等功狀來聞賜勅褒諭陞振為新平衛指揮使交州右衛指揮同知譚公政為順化衛試指揮使各賞鈔三百錠彩幣四表裏新平衛指揮僉事潘勤順化衛指揮僉事吳蔡皆陞本衛指揮同知各賞鈔二

百錠彩幣三表裏其餘千戶百戶百夫長同知知州判官
主簿及軍中總小旗等皆陞一級賞鈔幣有差

五月癸亥賜國子監交趾生鄧得等三十人冬夏衣衾靴

襪

甲戌陞行在兵部員外郎饒士榮為交趾按察使僉事

七月辛酉交趾右布政使莫勳及交州府知府杜希望等
言交州僻處南荒仰慕聖化積有歲年伏蒙皇上軫一視
同仁之念建設郡縣俾同內屬凡有寸長悉蒙收錄補報
之私切于夙夜今聞營建北京四海之內庶民子來而犬
馬之心有不能已謹以家丁杜瓢等五百人差縣丞黎獻

率詣闕下少效微勞上覽奏召獻等勞之曰爾等遠來趨
事備見誠意但營建就緒不欲重勞爾也人賞鈔二十錠
遣歸

八月戊寅朔交趾布政司右參政莫邃男嵩襲父職食祿
而不任事時邃與賊戰死故推其子云

己卯改隸交趾所屬巡檢司馬驛遞運所先是併省各府
州縣而其所屬衙門尚未釐正至是改交州府大堂縣之
三江口及場律橋二巡檢司隸威蠻州利仁州古榜縣之
泡橋永江口二巡檢司隸平陸縣武寧州武寧縣之市橋
馬驛及遞運所宣江府虎巖縣之三岐江口巡檢司各隸

本州長安州安謨縣之神投海門安謨海口小安海口虎
河隊江口四巡檢司隸安寧縣新安府河瑰縣之支隆渡
巡檢司隸鎮蠻府多翼縣新安府西關縣之支來莊巡檢
司隸鎮蠻府太平縣鎮蠻府新化縣之司置江口楊舍杜
巡檢司隸廷河縣神溪縣之古刀鎮巡檢司隸古蘭縣建
昌府俸田縣之俸田巡檢司隸建昌縣諒山府董縣之董
站驛隸鎮夷縣清化府古弘縣之會潮海口巡檢司隸古
藤縣愛州府河中縣之靈長海口靈長口二巡檢司隸本
州緣覺縣之天甲海口布衛海口二巡檢司及結悅縣之
豪渠口隊限二巡檢司隸九真州

九月辛酉交趾都司交州中前後及三江昌江又安新平
七衛及演州守禦千戶所缺官勅總兵官豐城侯李彬同
兵部尚書陳洽都督方政於清化鎮夷交州右三衛選多
餘指揮千百戶調補

十月庚辰陞廣東道監察御史童寅為交趾按察使

戊子交趾總兵官豐城侯李彬貢白象一黑象十七

庚寅設交趾鹽課提舉司之瀘江批驗鹽引所置大使一
員

十一月丁卯左軍左都督朱廣卒廣蘇州常熟人起自卒
伍從上征北虜及平內難咸有勞績積官至都指揮僉事

永樂初陞河南都指揮同知及隨總兵官平交趾以功累陞左軍都督後出鎮交趾以病卒賜祭及賻贈

十二月丁酉吏部言交趾布政司府州縣等衙門官吏赴京者當約量路程定期限考滿給由者請以十五日為期丁憂起復者請以十月為期過期論罪上命給由者仍寬三月

十七年二月辛丑勅諭交趾總兵官豐城侯李彬曰比有言爾所親信人掠民子女孳畜蓋爾約束不嚴之過夫為將之道在嚴紀律積威信果若人言良為爾惜蓋爾勳名豈一日所致者自今須加省察不可怠忽

三月癸酉設交趾諒山府及七源廣源上文下文萬崖上
思郎下思郎九真嘉興廣威十州多翼古蘭 溫鎮夷丹
巴脫淵大蠻宣化富良弄石大慈感化永寧宋江俄樂安
樂十七縣儒學宣化府陰陽學僧綱司廣威州陰陽學醫
學道正司萬崖州僧正司太平鎮夷二縣陰陽學太原縣
醫學僧會司道會司古蘭縣醫學道會司多翼洞喜二縣
陰陽學醫學道會司又安府常豐倉新平府常平倉建昌
府廣平庫

四月甲午交趾建平府土官知官番士文等八十四人
貢金銀器及方物賜鈔襲衣綺帛有差

五月丁未交趾布政司土官左參政梁汝笏率所屬郡縣土官貢金銀器方物賜鈔幣及金織紗衣有差

七月丁未交趾布政司副理問盧文政言交趾之人習於夷俗父母死止服黻衣土官生員吏遭父母喪亦不守制請以國朝所定喪禮頒示民間俾知遵守土官生員吏喪父母者悉解見職役丁憂庶漸革夷習上覽奏諭行在禮部臣曰三年之喪古今通制天下豈有無父母之人其悉從所言

八月乙亥設交趾靖安州珠場局置大使一員

壬子交趾清化賊首黎利以衆掠磊江都指揮黃誠等擊

之賊敗復遁入老撾
丙辰設交趾諒山府之七源鎮及三江府之歸化鎮宣化
府之宣光鎮金場局局置大使二員副使四員
九月丙辰并交趾化州之利蓬思荅二縣入士榮縣
蒲浪蒲苔三縣入化州順州之利調安仁不蘭巴闌四縣
入順州新平府之福康縣入衙儀縣南靈州之左平縣入
本州入安府之支羅土油二縣入衙儀縣土黃縣入古杜
縣真福縣入驩州偈江縣入石塘縣南靖州之盤石縣入
本州奇羅縣入河華縣驩州之東岸縣入本州清化府之
安定縣入永寧縣梁江縣入古雷縣東山縣入古藤縣清

化州之安樂縣入本州磊江縣入俄樂縣愛州之宋江縣
九真州之農貢縣各入本州諒山府之下文州入上文州
下思郎州入上思郎州七源州之脫縣入淵縣宣化府之
文安縣入曠縣乙縣入底江縣太原府之司農縣入安定
縣洞喜縣入富良縣太慈縣入宣化縣諒江府之鳳山縣
諒江州之安寧縣入清遠縣那岸縣入陸那縣諒江州之
保祿古隴二縣入本州上洪州之多錦唐安二縣入本州
建平府之望瀛太灣二縣入懿安縣建昌縣快州之芙蓉
縣入本州東結縣入永涸縣新安府之至靈縣入南策縣
東潮州之水棠縣下洪州之四岐縣各入本州清沔縣入

同利縣靖安州之支封縣入安和縣雲屯縣入靖安州三
江府洮江州之清波縣入本州麻溪縣入夏華縣沱江州
之古農縣宣江州之西欄縣各入本州交州府福安州之
清縣入東關縣芙蓉縣入福安州三帶州之安郎縣入
安樂縣扶寧縣入立石縣威蠻州之清威縣利仁州之利
仁縣各入本州北江府之超類縣武寧州之東岸縣並入
嘉林縣慈山縣入武寧州嘉林州之細江善才二縣北江
州之善誓縣廣威州之美良縣歸化州之安立縣嘉興州
之蒙籠二縣寧化州之赤土塊二縣演州之茶清縣各入
本州革鎮蠻府為鎮蠻州以所隸古蘭廷河二縣併入本

州多翼縣入太平縣奉化府為奉化州以所隸美祿順為
二縣并入本州西州縣入膠水縣革諒山府之鎮夷倉諒
江府芹站倉奉化府廣積倉北江府東岸縣稅課局

十月丁亥勅交趾總兵官豐城侯李彬今又安賊人潘僚
等雖已敗散而根底猶在宜督軍進討毋遺民患

十二月丙子交趾屯蓬海口巡檢司土官巡檢裴差等做
府州縣土官例以九年考滿至京吏部言巡檢三年給由
差等違制請論其罪上曰遐方之人未諳國典豈可遽罪
命復職後三年如例給由

辛巳交趾總兵官豐城侯李彬追勦黎姓等于鎮蠻府廷

河等縣連戰皆敗之斬獲五百餘人生禽偽金吾將軍武路等

丁酉巡按交趾監察御史黃宗載言交趾人民新入版圖勞來安輯尤在得人今府州縣官多係兩廣雲南等處歲貢生員下第舉人未入國學因其願仕遠方遂授以職既乏大學教養之素又非諸司歷試之才所以牧民者不知撫字理刑者不明律意若候九年黜陟廢弛益多宜令到任二年以上者從巡按監察御史及布政司按察司嚴加考覈上其廉污能否實迹以憑黜陟庶幾有所勸懲上從之

十八年閏正月己丑勅交趾總兵官豐城侯李彬曰朕命爾撫綏一方蓋欲軍士各安其所而致盜賊紛紛將何以這責今調雲南四川等處官軍益爾宜盡心殫慮早滅此賊若玩時愒日致賊益滋在於國典必亦難恕

辛卯交趾總兵官豐城侯李彬列奏都指揮劉震于瓚吳興前敗績之罪及為事都指揮陳濬禦寇之績上命械震等三人赴闕而宥濬罪俾復職

三月己丑命榮昌伯陳智為左參將協贊交趾總兵官豐城侯李彬勦捕蠻寇

四月戊午交趾總兵官豐城侯李彬獲賊首偽羅平王范

王五初敗走復歸東潮州聚衆劫掠卒禽之械送京師
五月丁丑勅交趾總兵官豐城侯李彬曰叛寇潘僚黎利
車三農文歷等迄今未獲未審兵何時得息何時得安宜
晝夜盡心廣為方畧早滅此賊以不負朕之委任
庚寅交趾右參政侯保率民兵禦賊死之左參政馮貴亦
以討賊戰死保真定贊皇人由國子生為襄城贛榆博興
三縣知縣有善政初設交趾郡縣擇人撫字陞保交州府
知府又陞交趾右參政時黃江賊黎利剽掠郡縣保率民
兵築堡於要害禦之賊來攻保與戰不勝而死貴湖廣武
陵人舉進士為兵科給事中從英國公張輔征交趾總督

兵餉克效勞勤還奏事稱旨陞交趾右參議提督金銀場
陞左參政能撫輯流民歸附者衆有土兵二千餘人皆勁
勇耐戰鬥每出擊賊輒有功後中官馬騏等嫉之盡奪其
土兵及黎利反衆強貴勦捕獨以贏卒數百遇賊兵寡賊
衆貴力戰而死保為政廉恕貴有材略其死也人皆惜之
十月庚申交趾總兵官豐城侯李彬遣交州後衛指揮使
方政追賊黎利過於老撾忙心河敗之利遁走

十一月己巳改河南右參政阮嗣於交趾布政司

壬午刑部增置雲南交趾貴州三清吏司都察院增置雲
南交趾貴州三道

十九年九月丙寅交趾總兵官豐城侯李彬奏請以前河南都指揮使薛鵬掌新平衛事遼東都指揮同知吳浩掌又安衛事從之蓋二衛久缺官鵬等時坐事隨彬立功也乙卯交趾總兵官豐城侯李彬遣都指揮王中等禽獲賊首楊恭初恭僭稱王聚眾作亂官軍追捕恭敗走不能得至是獲其舅氏杜妬為鄉導追至新安府峽西縣禽之遂械送北京

十二月壬寅交趾布政司言糧儲不敷宜以淮浙官鹽召商於交趾中納不次支給其交趾官鹽換金者不為常例一體兼中候糧足用俱停止下戶部議於是尚書郭資等

定議交州北江諒江新安四府每引米四斗折稻一石建
平清化二府每引米三斗五升折稻八斗七升又安新平
二府每引米三斗折稻七斗五升順化府每引米二斗五
升折稻六斗二升從之

二十年正月壬申豐城侯李彬卒彬鳳陽人父信以軍功
積官至濟州衛指揮僉事信老彬代職為人有智略從平
內難累陞右軍都督同知豐城侯初鎮交趾為左參將交
趾平還殄倭寇守甘肅累效勞勩後鎮交趾多勦戮叛寇
及是以疾卒賜祭追封茂國公給傳還其喪

五月庚申交趾宣化太原鎮蠻奉化清化新安等府及所

隸州縣學師生員方物詣闕謝賜五經四書性理大全為善陰薦書皇太子令禮部賜賚之

八月丁酉交趾參將榮昌伯陳智言交趾都司所屬大小官軍月糧及諸司官俸及計月支稻谷五萬七千七百石歲支六十九萬二千四百石有奇今交趾等府餽輸不給而廣東欽廉見儲糧十萬九百四十餘石乞令轉運給之為便皇太子從之命戶部速行

戊戌廣西博白縣吏王延廣言鬱林州博白北流陸川興業四縣歲運糧九萬餘石輸梧州平樂等四千戶所今其地儲積有餘而鬱林州水行可至廉州廉州去交趾新安

俱近若以鬱林及博白等縣糧輸廉州倉令交趾軍民自
運其廉州縣糧則以輸交趾新安萬寧甚便皇太子從之
十一月庚辰交趾交州右衛土官都指揮陳封等十三人
來朝進金銀器皿等物賜織金紵絲襲衣及鈔幣表裏有
差

十二月辛卯以交趾叛寇黎利久未獲遣勅切責參將榮
昌伯陳智等

二十一年五月癸巳設交趾順化府永積庫

七月庚辰交趾布政司右參議房安卒安汝陽人洪武中
由國子監生擢北平按察僉事陞江西按察使上即位安

坐事謫戍興州後召為監察御史陞福建布政司右參政
再陞工部左侍郎數日出為山東布政司右參政同官魏
瑛誣告安誹謗事徵下獄安不勝掠治悉引伏闔家謫戍
交趾安繫聽決會瑛他罪覺併驗所告安事非實遂釋安
召還其家人改為四川右參政未幾復改交趾至是以疾
卒安坐於吏事所至嚴刻為治人多怨之然能以廉自守
云

二十二年三月己亥交趾安寧縣知縣阮宗楊等貢銀器
土絹等物賜羅衣及鈔幣表裏有差

五月辛丑交趾都指揮同知徐諒鳳陽定遠人先任四川

都指揮同知永樂四年從西平侯沐晟征交趾每戰克捷
多著功績遂調任交趾都司及守清化陳季擴聚眾為亂
官軍討敗之諒與有功賜白金文綺至是卒子振襲交趾
衛指揮僉事

八月己未交趾七源州判官趙福能貢馬賜鈔幣有差

九月乙亥交趾參將榮昌伯陳智貢玄鹿

丙子召掌交趾布政司按察司事工部尚書黃福勅曰卿
國家老成人久勞于外朕篤念不忘亟欲見卿即馳驛還
京以副延佇之意

十一月壬辰命都督方政為參將同榮昌伯陳智鎮守交

止遣人齎制諭往付智等仍勅智等將孟瑛原受制諭封
識繳回

洪熙元年正月庚寅降勅切責交止參將榮昌伯陳智都
督方政慢功養寇之罪令改過自效仍命械送都指揮師
祐張雄等赴京以監察御史言其貪虐不律尤甚也

二月戊申贈交止布政使司左參政馮貴為本司左布政
使右參政侯保為右布政使貴舉進士初為給事中太宗
皇帝嘉其才陞交止布政司參議又陞參政貴在交止屢
以土兵破賊後土兵悉為中官馬騏所據貴追賊戰於瑰
縣死之保守黃江堡賊犯堡保力拒之數月不支亦死事

具永樂實錄至是尚書黃福聞于上遂有是命

丁卯謫兵科給事中劉渙充吏交趾以渙奉命鎮交趾不俟代輒還也

三月辛卯命安平伯李安為參將往交趾與榮昌伯陳智同掌軍務賜勅勉之曰爾父明達道理持身謹行盡忠國家朕未嘗忘爾亦能卓立繼父之志出入軍旅通練事幾朕用嘉之今特付爾一方之寄其益敬慎盡心效謀懋建功業庶幾有光爾父而不負朕之委任欽哉

七月己卯交趾布政司奏各府州縣儒學自永樂十三年開設以來並無朝除教官多是土人訓誨通經者少諸生

頗知讀書然皆語言侏儻禮法疎曠雖務學業未習華風
若除教授學正教諭董率土人訓導端其模範示以教條
庶幾日就月將耳濡目染變蠻夷之習復華夏之風實為
美事上曰古稱立賢無方又曰有教無類況師者人之模
範用夏變夷莫先於此其令吏部選除

丙戌交趾各府州縣儒學選貢生員王憲等八十二人至
京師上諭行在禮部尚書呂震等曰交趾距京師萬里遠
離親戚而來須是教養得宜彼乃樂學可望其成材爾與
學官宜知朕此意其衣服歲賜如雲南之例
辛卯行在吏部奏交趾右布政使弋謙由副都御史初陞

輒乞還鄉祭祖然後赴任緣先奉仁宗皇帝聖旨外任官
須九年考滿乃許祭祖上曰謙赴遠任欲展省而行此人
情也許之
八月丙子交趾阮可朗等伏誅可朗初從賊首路文律叛
逆事敗逃老撾其後屢入攻劫州縣至是為官軍所執凡
十有六人悉械送京師誅之
交趾武寧州民阮克等言五事上覽之謂侍臣曰其辭鄙
俚可憎但云用人當先擇牧守雖常談其意亦善所云交
趾有蜈蚣採之可得明珠為希世之寶蓋欲以諂媚希恩
也凡人進言雖不當朕未嘗拒此人語却妄誕左右有請

罪之者上曰但不聽之耳蠻民何足罪
十二月壬午交趾布政司土官左參政梁汝笏等來朝進
金銀器方物上謂尚書呂震曰汝笏雖土人頗忠實招民
珍寇累累有功今來朝當厚賚以獎勵之凡所進物皆酬
其直於是賜汝笏鈔二百錠錦綺四表裏賜其從人鈔有
差償所進物凡給鈔七千四百八十錠
丁亥交趾三江衛指揮僉事阮嫩清化衛指揮僉事黎巴
蘭等貢馬及方物
宣德元年正月辛酉賜交趾布政司土官參政梁汝笏交
趾清化府人敬事朝廷以殺賊及招撫功累陞至參政至

是來朝特賜以旌之 案此文疑有脫誤

二月己卯交趾土官奉化府同知阮子晉清化府推官潘
坦之宋江縣知縣阮克誠磊江縣句歷巡檢司巡檢武存
忠神投海口巡檢何師唐支隆海口巡檢宋變順化府經
歷陳巨茶偈縣縣丞潘吟乍令縣縣丞黎托蒲浪縣縣丞
黎已牢利蓬縣主簿阮士長美留縣縣丞吳景傍利仁川
永江口巡檢張箇牢華州知州楊夢松同知張源注思州
知州范公議同知武征義州同知范昉昇州知州阮堯多
翼縣丞吳景佺新安府竹同社巡檢阮雕建平府巴粹口
屯巡檢丁異多錦縣主簿阮多里义安府通判阮思立奇

羅縣主簿黎汝付東岸縣主簿阮居易嘉林縣縣丞蘇伯
恭水尾縣縣丞黃拾珠等以考滿至京進土絹生香

四月乙丑勅安平伯李安掌交趾都司事仍聽總兵官節
制勅交趾三司官曰今命成山侯王通等率師討賊通
至選土兵三萬人聽其調度務殄此寇以安一隅所屬官
吏軍民方以供億軍旅為重其外一切事務悉停止毋以
勞民

丙寅削榮昌伯陳智都督方政官爵降充為事官聽總兵
官王通調遣為前鋒立功贖罪其所領制諭並征夷副將
軍印付通繳進勅諭智等曰朝廷命爾統兵往鎮交趾遏

絕盜寇惠安黎利爾等懷私苟利不相輯睦致賊猖獗失陷官軍虐及良善論爾之罪萬死莫贖今姑曲宥但俱削爵即從成山侯王通等立功以贖蔡福愚戇敗事亦姑貸死立功如臨陣不武必誅不宥命神機等營都指揮謝榮等五百一十人隨成山侯王通往征交趾從通所奏也甲戌以前征交趾都指揮僉事張貴為湖廣都指揮僉事仍隨王通往進

乙卯罷交趾布政司右布政使戚遜為民初遜督事郡縣役民造船買女子載以自隨巡按御史沈福劾奏治之遜引伏遇赦當復職吏部以聞上曰罪雖赦前贓穢之人豈

可復居方面其罷之

癸巳交趾交州府等衙門考滿土吏楊巨兩等四百六人
貢方物

五月辛亥賜交趾交州等府州縣考滿土吏楊巨兩等四
百六人鈔有差
丁巳交趾為事官陳智言賊首黎利聚眾據茶籠州官軍
討捕未獲又安演州清化等處亦用官軍哨備而各衛兵
不足已會議盡撤交州左等十四衛屯田官旗軍二千六
百餘人征守今九真州典史海口有賊船劫虜居民又本
州有賊聚集鄉社招納叛逆又宣化太原等府州縣數被

紅衣等賊為害請以交州左右中前後及昌江鎮夷三江
市橋九軍屯田土軍八千餘人中摘五千人征哨免其歲
徵子粒賊平之後如舊屯田從之
六月壬申交趾利蓬等縣土官知縣胡辰等來朝貢馬及
方物
辛卯賜交趾利蓬等縣土官知縣胡辰等鈔綵幣表裏襲
衣有差
九月癸卯勅廣西總兵官鎮遠侯顧興祖于所領官軍內
調五千人赴交趾聽成山侯王通節制
丁巳征夷將軍成山侯王通等師至交趾

十月辛巳陞交趾右布政使阮勛為左布政使以其在職九年擒賊撫民有功故也

十一月丙辰交趾土官左布政使阮勛奏家人潘犬等一百七十五戶編籍諒江等府州縣為民願免徭役以足養贍命行在戶部移文免之

十二月庚申朔賜交趾左布政使阮勛誥命并封其祖母父母妻仍勅諭勛曰昔我皇祖太宗文皇帝臨御俯念交趾為黎寇造福弑君虐民是用興師弔伐師初臨境智者傾誠歸化愚者猶懷疑貳爾阮勛存心端實操慮純良達事之機識天之道奮抒誠悃歸向朝廷殫心竭勞以效

任使撫順剪逆助益良多歷年滋深秉心不懈我皇祖重
乃勛績屢進爾官朕祇紹鴻圖懋惟繼述今爾考績來朝
嘉念乃勛特隆恩命逮及祖考咸錫褒榮夫君臣相與當
務始終朕體皇祖之心以待爾爾推事皇祖之心以事朕
恪恭乃職永篤不渝用崇令譽延慶永世特茲獎諭汝惟
欽哉

丁丑交趾蠻賊萬餘人攻圍隘留關守關百戶黃彪等被
害百戶萬琮潛登城大呼與敢死士揮刀從南門出擊賊
賊退走

乙酉勅交趾總兵官成山侯王通參將都督馬瑛今命安

遠侯柳升黔國公沐晟等率師由廣西雲南兩路並進同爾等殄滅此寇爾宜固守城池操練軍馬俟升等至日進兵

丁亥總兵官安遠侯柳升等奏今往征交趾當用令旗牌面上令行在工部製與之

二年正月乙未賞北京從征交趾官軍都督鈔二千貫都指揮一千貫指揮九百貫千戶衛鎮撫八百貫百戶所鎮撫七百貫旗軍人等各六百貫給紵絲紗羅衣八十襲付總兵官安遠侯柳升赴軍前備賞

六月癸亥命行在兵部授交趾軍丁李茂先阮宗豹黃添

保為百戶賜冠帶衣鈔給驛馬遣詣安遠侯柳升聽用時
交趾久無奏報三人者從間道潛馳報昌江被圍甚急故
有是命且勅升及黔國公沐晟等急援昌江

七月己亥詔逮鎮遠侯顧興祖時交趾叛寇破隘留等關
攻圍丘溫興祖擁兵南寧太平不援致寇陷城又興祖先
奏已獲賊首韋萬黃梟首示衆而萬黃出沒劫掠如故興
祖又遣指揮張珩等假以軍務逼取土官人等金銀二千
五百餘兩馬百餘匹又強奪民居挾娶女婦等事為巡按
御史劾奏上以其稔惡不悛命行在都察院逮問仍命公
侯大臣別舉良將代之

十一月辛卯驛報安遠侯柳升等沒于賊上曰朕以升前
在交趾熟知地利人情是以用之然恐其恃勇而驕故切
戒其持重且謂賊無他技惟設伏詐降以誘敵必升不用
朕言致有此失此升負朕也歎惋久之

三年正月丁亥命都指揮僉事黃珖張貴鎮守龍州憑祥
坡壘等處聽總兵官都督山雲節制初命總兵官都督蕭
授守備坡壘至是黎利請罷兵息民復陳氏之嗣遂命授
回貴州防禦而命珖等守龍州勅珖曰爾忠事朝廷盡心
邊務多效勞勩朕甚嘉之故既陞爾之職今命爾專領土
軍與張貴鎮守龍州憑祥坡壘等處往來備禦仍聽都督

山雲節制爾等其益據忠烟撫恤軍民慎固邊備以副朝廷眷任之重

丙申勅總兵官都督山雲曰凡廣西軍務一以委卿卿宜夙夜盡心嚴固邊備撫綏得宜俾軍民相安於無事用稱朕任使之意欽哉

二月丙辰勅湖廣都司布政司按察司及巡按監察御史凡征進交趾在逃官軍俱宥其罪限兩月內各回原衛所如仍逃不出禽獲至者必依軍法處治

辛未行在兵部奏昨總兵官都督僉事山雲以廣西缺兵備禦請益兵擬以湖廣諸衛征進交趾回還官軍益之上

命已還至廣西皆留之未至者令還原衛所

四月戊寅交趾土吏黎宗補等十五人考滿在京上念其有父母妻子命行在吏部悉遣歸仍勅都督山雲遣人護送至交趾境

閏四月庚戌公侯伯五府六部都察院等衙門奏王通陳智馬瑛方政弋謙等上違朝命擅與賊和棄城來歸山壽庇護叛賊馬琪激變一方皆已伏罪宜寘重典命悉下錦衣衛獄法司又奏通等于律皆應籍沒其家從之 下鎮遠侯顧興祖行在錦衣衛獄初監察御史劾奏興祖貪財好色失地喪身等罪上命逮至法司同公侯伯等訊之興

祖引伏命侯王通等還論其罪至是通還左都御史劉觀
請并罪之遂下錦衣衛獄

五月甲戌鎮守廣西總兵官都督山雲奏交趾黎利以兵
迫脅廣源州土官知州閉色新從己色新父子不從分守
山寨潛遣人來言緩急乞以兵援上遣勅報雲曰閉色新
嚮慕朝廷忠義可嘉然朕不欲以土地之過至于殺人卿
宜審勢度力可援則援不可則已若其父子來歸即收入
內地加意撫綏勿令失所

乙亥賜交趾新安府所屬來朝土官主簿鄭吳等并土僧
智深等二十人銀鈔綵幣表裏紵絲衣服布絹等物有差

四年二月戊子勅都督山雲量撥廣西近地衛所帶管軍士赴南寧都指揮花英量撥廣東衛所帶管軍士赴欽廉選指揮千百戶之老成精練者領之協助戍守初工部侍郎羅汝敬等使交趾還言欽廉南寧守備寡弱故有是命丁酉交趾按察司副使戈定遠以老疾致仕定遠浙江海鹽人由監察御史陞副使能持己不炫名考滿復職至廉州道梗還京師以疾命致事

戊戌行在吏部左侍郎郭璉奏交趾回京官若京官方面官例送各部聽差月與食米一石其餘記名放回以俟召用今員外郎闕巽知府陳耘等一百六十四員在途稽延

最後至當究治罷其職上曰道遠或貧或病有不得已不必罪悉如前例其中有老病者令冠帶還鄉

四月乙未詔軍士自交趾還者於所在軍衛收役先是上詔征守交趾軍復原伍其後有徑還其鄉不赴原衛者行在兵部以其中精銳者多慮有更易之患請令軍衛有司挨訪其鄉近原衛者令赴衛遠則收於所在衛所其陣亡補役者亦然上從之且曰若再不赴役以逃論以弱易壯者罪之親戚鄰里蔽不首者同罪

六年五月丙寅安南黎利遣頭目何粟等陳情謝罪貢方物其詞云宣德五年八月內臣所差頭目陶公僕等自京

回齋至勅書一道諭臣兵器所以衛民安南之民皆朕赤子留之于彼與在此同寘之不問臣與一國之人莫不歡欣感戴惟官吏軍民家口及陳氏猶以為諭臣自知負罪深重無地措躬臣竊惟天地之大無一物而不包日月之明雖容光而必照臣前後欽奉聖諭累次差人齎本再三陳奏未蒙俞允臣以聖天子仁民之盛意緣前項人等委的無存難以應命此臣所以跼天踏地但增憂懼而已其陳氏子孫于季犛篡國之時屠戮悉盡所存庸暗之人若簡定季擴等永樂年間相繼作耗大軍剿除無有遺者今奉聖諭臣又大集國人再行用心詢訪委無見存伏望聖

慈俯垂矜察赦臣丘山之罪霈臣雨露之恩豈獨一身之
幸實臣一方生靈之大幸也粟等又賁其頭目耆老人等
奏為求封事欽奉勅書准臣等所奏黎利謹厚忠信撫綏
有方甚得民心可堪管攝朕用嘉悅又令大集國人更詢
陳氏如果無後連名奏來朕與處置臣等一國之人莫不
歡忻踴躍喜出望外除欽遵大集國人徧行詢訪陳氏子
孫委的無存臣等切惟本國地方不可無人管攝而黎利
未奉朝命此臣等所以懇款陳詞而不能已也伏望皇上
俯矜下情從民所欲允臣所請大霈洪恩使黎利得以守
土南荒奉貢天闕上以弘聖天子一視之仁下以蘇一方

生靈之命上納之

六月己亥遣行在禮部右侍郎章敞右通政徐琦齎詔命安南頭目黎利權署安南國事詔曰朕恭承大寶統御下民體天心以愛人順人心以為治海內海外一視同仁爾安南密比中夏國家受命爰先來歸我祖宗咸勤綏撫曩因其下黎季犛篡弑國主毒痛一方太宗皇帝遂命弔伐之師將復陳氏之後而陳氏子孫徧求弗獲乃徇輿情建郡縣置牧守宣德二年十月有陳暲者自陳故安南王嫡孫歸自老撾而與頭目黎利同奏請立暲繼陳氏之位言詞懇至朕仰惟先志俯矜下情即召還所置守吏及鎮戍

之兵願以建立事重須叶國人遂下詔國中以察衆意曾
不旋踵黎利奏言曷卒果天意乎抑人謀歟自是連歲安
南頭目者老並奏陳氏之後已絕請以黎利管攝國事衆
口一詞累章不已果得人以撫衆固朕心之所嘉今允所
請特遣使齎印章命利權署安南國事以撫國人於乎從
民所欲弘敷天地之仁事大以誠用保生靈之福故茲詔
示咸使聞知別勅利曰今命爾權署安南國事其服膺朕
命無驕無慢惟誠可以格天惟敬可以事大惟仁可以撫
衆惟信可以保邦益殫乃心用迓來祉欽哉賜何栗等鈔
幣遣隨敝等歸仍賜敝等鈔為道里費

七年二月丙申行在禮部侍郎章啟等使安南還權署安南國事黎利遣使阮文絢等奉表隨啟等來朝謝恩貢金銀器皿及方物

三月庚辰賜安南使臣阮文絢等鈔幣遣歸

八年八月辛卯權署安南國事黎利遣使人陳舜俞等奉表箋貢金銀器皿及方物

閏八月庚午賜安南使人陳舜俞等文綺襲衣并鈔遣還命兵部侍郎徐琦行人郭濟齋勅諭黎利與舜俞偕行蓋申諭利令上順天道下造民福以保令終

九年三月甲戌廣西總兵官都督僉事山雲奏交趾黎利

已卒長子狂妄次子幼弱姦臣黎問黎察竊權構黨恣相
讎殺良民驚懼諒山府脫縣土官阮世寧七源州土官阮
公庭各率家屬及部下三百餘人避難來歸願於廣西龍
州及太平府上下凍州居住上勅雲曰黎利本起賤微因
奉陳嵩以從人望堅請立之朕志在息民遂詔罷兵將察
實建立而彼遽奏嵩死嵩之死利所為也此時朝廷即欲
加兵但不忍荼毒生靈故體上天好生之德敷曠蕩之恩
姑令權署國事其行不義如此宜為天所斃也爾等宜戒
飭邊兵嚴謹守備不可怠忽阮世寧等避難來歸宜加意
綏撫聽隨便居住凡所食用皆官為處置使之得所無失

遠人來歸之心

宋陽明先生全集

卷六

館藏安南棄守本末一書不著撰人名氏丁氏善本書室
藏書志引吳翌鳳跋尾云是書僅見於絳雲樓書目己亥
春日借甫里嚴蔚本鈔錄惜未得彼國志載而一證之則
此書似從吳本錄出以明實錄勘之無不吻合蓋明人從
實錄中輯出者顧訛字奪文不一而足已詳校記中而鈔
胥漏失亦殊匪尠悉為補出學者參互而讀之其中原委
曲折纖悉具詳於以考鏡得失不難矣原永樂之收安南
為郡縣其功在張英國公之經營黃忠宣之撫輯使當年
法太祖以沐氏鎮雲南故事何至盡隳前勳及宣德之棄
為外藩也中官之貪墨苛擾將帥之寡謀怯懦要不得辭

